



En regurdientscha da Fabienne Berther

ic La sera, cu ins ha supplicau mei da scriver zacontas lingias en regurdientscha da Fabienne Berther, ha la steila sur l'alp Pazzola sclariu suenter bunaimein in meins da malaura a moda splenduronta. Mala e bial'aura sebrattan. Aschia vegn ei a restar aschi-ditg ch'il mund exista. Nus havein negina pussei-vladad d'influenzar quei fatg, stuein acceptar la realitat e far il meglier ordlunder. Per crescher e prosperar drova ei plievgia e sulegl. – Dess ei mo ventira e letezia, savessen nus buca appreziar quellas valurs. Pil pli madirescha la dolur il carstgaun.

Il Segner ha dau, il Segner ha priu, siu num seigi benedius

Il Segner ha dau

La veta terrestra da Fabienne Berther ei stada cuorta. Strusch diesch onns! In pign interval ha ella passentau en nossa cuminonza, surtut ella cuminonza dalla famiglia da Monika e Pancrazi Berther cun sias soras Ines, Marion e Gina. Fabienne ei naschida ils 11 da november 1991, il di da sogn Martin, sco schumellina. Ella ha gudiu ina biala e ventireivla affonza cun sia famiglia e culs previlegis d'haver la cara tatta Cecilia, ils augs e las ondas. Cun siu natiral allert e viv, ses cavegls brin-cotschens e lentagens haveva ella spert access al concarstgaun. Sias finamiras pil futur eran claras. Sia professiun mondi en ina direcziun sociala. En quella vegliadetgna semidan ils giavischs professiunals per ordinari pliras ga. Mo ella era perschuaizada da quella via. Ella vegli segidar culs fleivels. Cun quella perschuaision ha ella bandunau nus. Quei ei siu davos messadi.

Il Segner ha priu

Tut pareva sin buna via. Mo en in batardegl eisi semidau. Ils 5 da fenadur 2001 encunter sera serenda Fabienne cun siu velo tier sia conscolara a Selva. Ellas fan da sezuppar. Tuttenina auda l'amitga in griu d'agid e damonda immediat su cuors sin via principalia. La colonna d'agid anfla Fabienne sper il Rein al pei dil grep damaneivel dalla caplutta da Sontga Brida. Il mieri e la polizia san mo constatar igl accident e la mort da Fabienne. Ina tragica disgrazia! Ina greva frida pil bab che retuorna d'ina excursiun cul velo al liug dalla disgrazia ed anfla sia feglia morta. La famiglia ei sfraccada dil crudeivel destin. L'entira Val pren art e part. Quei attesta la baselgia fullanada la dumengia a caschun dalla sepultura. Sur plevon dr. Ozioma Nwachukwu ha preparau in edificont survetsch divin, embellius a moda perfetga da siu scolast, da sia scolasta, da sias conscolaras e conscolars. Igl ei dira realitat. Fabienne ei buca pli. Il Segner ha priu ella anavos tier El.

Siu num seigi benedius

En muments da disperaziun sefan da tuttas sorts sentiments. Igl emprem mu ment ein ins stuius. Serebalza. Sa buca acceptar. Sedamonda nua ei quei Segner insumma? Daco sancziunescha el ina tala disgrazia? Exista el insumma? Daco tucca ei nus e buca ils auters? - E lu sefa la nunpussonza, la tristeza. - E la finala damogna la speranza.

La partenza anetga da Fabienne ha midau bia. Ella ha reviult nos cors e tuccau sil viv. Nossa cardientscha viva dalla speranza, dalla speranza sin in salvament etern e sin in seveser. Mo quella dat a nus la forza da seremetter e d'encurir il senn el nuncapeivel. La finamira da Fabienne ei stada da s'engaschar pils fleivels en nossa sociedad. Per carstgauns agl ur dalla cumionza. Siu davos messadi ei staus d'arver il cor per il destin dil concarstgaun. Da veser nies pli stretg vischin cun auters egls, d'haver capientscha per la dolur e las suffrientschas dils auters. Reus sescha ei a nus d'ademplir quei davos avis da Fabienne, lu ha sia mort in grond senn.

Cara Fabienne, sin seveser!